

FORUM CULTURAL TUJETSCH

André Schmid, president

Il mardis vargau, ils 22 da fevrer 2005, ei il Forum cultural Tujetsch vegnius envidaus tier ina occurrenza culturala dalla banca UBS. Sin fundament d'ina damonda da sustegn per la restauraziun e conservaziun dil Casti da Putnengia, ha la fundaziun da cultura dalla UBS reconuschiu nies project e concediu la summa da 25'000.00 francs.

La finanziaziun da projects culturals ei ina stunclentusa lavur che pretenda bia perschuasiun, per aschia saver leventar emoziuns, las qualas meinan ad in sustegn finanziel. Putnengia ei igl emprem casti allas rivas dil Rein ed era il sulet en nossa vallada. Davart l'istoria ei segir la claustra da Mustér, la quala administrava il territori da nossa vischnaunca da gronda muntada. Plinavon la feudala schlatteina Putnengia e cun quella il prenci-avat Pieder de Putnengia. 1402 e 1438 empeila Pieder de Putnengia la sort dalla abbazia da Mustér e porta sco emprem il tetel da prenci-avat. Durent suu temps da reger e cun suu sustegn ed engaschi persunal nescha ord la Ligia da Glion da 1395 la Ligia Grischa, ch'ei vegnida fundada a Trun sut igl ischi ils 16 da mars 1424.

Ils cuosts per la restauraziun e conservaziun dil Casti da Putnengia ein calculai cun rodund 240'000.00 francs. Tochen il di d'oz havein nus recaltgau la biala summa da 125'000.00 francs. Vitier vegn il sustegn finanziel davart il cantun cun 42'600.00 francs. Pia resta ei a nus aunc da procurar per la finanziaziun restonta da 72'400.00 francs. Nus essan fetg satisfatgs d'igl andament dallas lavurs ed era dalla gronda simpatica e sustegn finanziel che nus gudin.

La banca UBS sustegn differents projects culturals en Svizra. Per quei intent ha la banca ina fundaziun cun in capital da 30 milliuns. Ils recavs annuals da quei capital (rodund 1.5 – 1.6 milliuns) vegnan impundi onn per onn en projects culturals. Igl onn vargau han els susteniu buca meins che 10 projects cun la summa totala da 267'000.00 francs el cantun Grischun. Denter ils honorai sesanflein era nus cun ina summa da 25'000.00 francs. Il cau da banca UBS per il cantun Grischun Andrea Just ha en suu plaid da beinvegni fatg menziun dil grond engaschi cultural ed il gronds scazis culturals en nies cantun. En cumparegliaziun cun ils ulteriurs cantuns vegn nies cantun adina puspei sustenius surproporzionalmein. Suenter il plaid da beinvegni ha igl artist Hannes Vogel referiu sur dils novs indrezs da cazzola ella banca a Cuera. Silsuenter ha la Fondazione Ente Museo Poschiavino referiu sur d'in niev project dalla „Casa Tomé”. Ina tipica casa da purs ch'ei sementenida sur tschentaners ora. Tochen avon 15 onns ei quella casa stada habitada senza indrezs electricis ni d'aua. Strusch da capir ch'ei saveva reger ina tala paupradad avon aschi cuort temps. La fundaziun ha acquistau quella casa per saver mantener ella el stan original.

Suenter la part ufficala essan nus vegni envidai ad ina tscheina ell'ustria Marsöl a Cuera. Las differents specialitads ord il Puschlav han gustau ad in e scadin. Differents discuors cun glied da medem interess ord gl'entir cantun Grischun han dau perdetga dil grond engaschi per nossa cultura.

Davart il Forum cultural Tujetsch saudi d'engraziar grondamein alla banca UBS per il grond sustegn finanziel en favur da nies project Putnengia. Engraziar lein nus denton era als ulteriurs donnaturs e fautors. Il forum gauda in grond sustegn finanziel e moral. Mo aschia eis ei pusseivel a nus da saver luvrar per nossa cultura e realisar differents projects. Plein curascha ed engaschi continuein nus cun nossa lavur ed grondamein a tut quels che segidan e sustegnan nus onn per onn.